

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov>

**HARI RABU, 26 OKTOBER 2016, PUKUL 10.00 PAGI**

**Bil. 36**

---

**PERTANYAAN-PERTANYAAN BAGI JAWAB LISAN**

1. PR-1343-L75531  
**Dato' Sri Hasan bin Malek [ Kuala Pilah ]** minta **MENTERI LUAR NEGERI** menyatakan apakah fungsi, sumbangan dan pencapaian Malaysia sepanjang menjadi Anggota Tidak Tetap Majlis Keselamatan Pertubuhan Bangsa-Bangsa Bersatu dari tahun 2015 hingga 2016.
2. PR-1343-L76273  
**Dr. Lee Boon Chye [ Gopeng ]** minta **PERDANA MENTERI** menyatakan jumlah peruntukan untuk Ekuinas Nasional Berhad sejak penubuhan pada tahun 2009, serta pulangan dividen setakat ini.
3. PR-1343-L75562  
**Datuk Dr. Makin @ Marcus Mojigoh [ Putatan ]** minta **MENTERI SUMBER ASLI DAN ALAM SEKITAR** menyatakan :-
  - (a) tindakan yang telah diambil oleh pihak Kerajaan bagi menangani kesan fenomena pemanasan global dan jenis bantuan yang diberikan kepada para penduduk tepi pantai yang mana sawah padi mereka dinaiki air laut akibat fenomena ini; dan
  - (b) langkah yang diambil bagi mengatasi masalah pemutihan terumbu karang (yang mana pendapatan nelayan pantai terjejas akibat tempat pembiakan ikan telah musnah).
4. PR-1343-L77121  
**Dato' Johari bin Abdul [ Sungai Petani ]** minta **MENTERI PENGANGKUTAN** menyatakan :-
  - (a) Joint Investigation Team (JIT) telah mengesahkan bahawa MH 17 Malaysia Airlines telah ditembak jatuh oleh puak pemberontak Pro-Rusia di Ukraine, menggunakan peluru berpandu BUK 9M38, apakah tindakan Kerajaan selanjutnya; dan
  - (b) kaedah-kaedah yang bakal diambil oleh kerajaan dalam menuntut agar keadilan akan dapat dicapai.

5. PR-1343-L77254  
**Datuk Rozman bin Isli [ Labuan ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah keberhasilan langkah pengasingan sisa pepejal mengikut kategori diperkuatkuasakan dan berapakah jumlah kos pengurusan dan pembersihan yang telah berjaya dijimatkan.
6. PR-1343-L77457  
**Tuan N. Surendran [ Padang Serai ]** minta **MENTERI DALAM NEGERI** menyatakan tindakan-tindakan yang diambil bagi menyelesaikan masalah kesesakan penjara di seluruh negara.

**[ Pertanyaan di bawah PM.22(5) ]**

7. PR-1343-L76046  
**Datuk Hajah Norah binti Abd Rahman [ Tanjong Manis ]** minta **PERDANA MENTERI** menyatakan perkembangan semasa penubuhan Majlis Halal Malaysia (MHM) yang diumumkan pada bulan Februari 2016 bagi menggantikan Jawatankuasa Khas Kabinet Pengurusan dan Pembangunan Industri Halal Malaysia.
8. PR-1343-L77086  
**Puan Kasthuriraani a/p Patto [ Batu Kawan ]** minta **MENTERI KERJA RAYA** menyatakan rancangan untuk menambah baik serta melebarkan jalan keluar masuk sekitar Tol Bukit Tambun dan Simpang Ampat serta penambahbaikan sistem memandangkan bilangan kereta telah meningkat. Jika ya, berapakah kos, jenis penambahbaikan serta syarikat dan tempoh masa kerja tersebut akan dijalankan. Jika tidak, mengapa.
9. PR-1343-L76620  
**Tuan Haji Hasbi bin Haji Habibollah [ Limbang ]** minta **MENTERI KEMAJUAN LUAR BANDAR DAN WILAYAH** menyatakan bilakah Kementerian akan membina sebuah Pusat Giat Mara yang kekal di Limbang kerana Pusat Giat Mara Limbang pada masa ini adalah sementara sahaja.
10. PR-1343-L76957  
**Tuan Ahmad Baihaki bin Atiqullah [ Kubang Kerian ]** minta **MENTERI KERJA RAYA** menyatakan nama syarikat yang sedang menjalankan projek pembinaan lebuh raya yang menghubungkan antara Machang ke Gua Musang, di negeri Kelantan dan sudah berapa peratus pelaksanaannya sehingga kini.
11. PR-1343-L75686  
**Dr. Noor Azmi bin Ghazali [ Bagan Serai ]** minta **MENTERI KESIHATAN** menyatakan apakah peratusan doktor pelatih yang gagal semasa 2 tahun dalam latihan, apakah sebabnya dan apakah tindakan Kerajaan untuk membantu mereka setelah banyak masa dan wang telah dibelanjakan untuk lulus dalam kursus perubatan baik di dalam negara atau luar negara.

12. PR-1343-L76518  
**Dato' Dr. Tan Kee Kwong [ Wangsa Maju ]** minta **MENTERI WILAYAH PERSEKUTUAN** menyatakan berapakah projek rumah WP yang telah dibina atau sedang dalam pembinaan.
13. PR-1343-L75710  
**Datuk Aaron Ago anak Dagang [ Kanowit ]** minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah rumah orang tua di Malaysia yang di bawah jagaan Kerajaan dan di bawah kendalian Pertubuhan Sukarela Kebajikan, mengikut negeri. Berapakah bajet tahunan Kerajaan untuk membantu golongan orang tua dan untuk perkhidmatan -perkhidmatan seperti di atas.
14. PR-1343-L76208  
**Puan Teo Nie Ching [ Kulai ]** minta **MENTERI PENDIDIKAN** menyatakan jumlah aduan yang diterima setiap tahun sejak 2010 yang mana guru-guru didakwa mencabul murid-murid dan apakah tindakan yang telah diambil terhadap mereka yang dituduh juga tindakan yang telah diambil terhadap seorang guru di Hulu Selangor yang didakwa mencabul sekurang-kurangnya sembilan orang pelajar.
15. PR-1343-L75740  
**Datuk Jumat bin Idris [ Sepanggar ]** minta **MENTERI KEWANGAN** menyatakan :-
  - (a) apakah Kementerian mempunyai rancangan untuk mengubah kadar GST pada masa hadapan; dan
  - (b) berapakah kutipan GST setakat hari ini.
16. PR-1343-L77070  
**Tuan Gooi Hsiao-Leung [ Alor Setar ]** minta **MENTERI TENAGA, TEKNOLOGI HIJAU DAN AIR** menyatakan butiran sebarang peruntukan/pinjaman Kerajaan Persekutuan yang telah diluluskan atau dalam pertimbangan tahun ini, untuk projek-projek menaiktaraf atau membina loji-loji rawatan air bagi meningkatkan pengeluaran dan bekalan air di Kedah, dan sekiranya ada bilakah projek-projek tersebut akan dilaksanakan.
17. PR-1343-L76910  
**Dato' Noraini binti Ahmad [ Parit Sulong ]** minta **PERDANA MENTERI** menyatakan bagaimana pihak Kementerian akan menggunakan peruntukan yang diberikan bagi membendung jenayah *cybersexual* terhadap kanak-kanak sejak ia semakin meningkat.
18. PR-1343-L75655  
**Tuan Chua Tian Chang @ Tian Chua [ Batu ]** minta **PERDANA MENTERI** menyatakan adakah benar pekerja Petronas seramai 51,000 akan kehilangan pekerjaan mereka. Apakah langkah-langkah yang akan diambil Kementerian melindungi kebajikan pekerja-pekerja ini.

19. PR-1343-L76499  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI PENGANGKUTAN** menyatakan apakah langkah-langkah Kementerian dalam meningkatkan tahap saringan keselamatan di semua pintu masuk lapangan terbang antarabangsa negara.
20. PR-1343-L76136  
**Tuan Wong Ling Biu [ Sarikei ]** minta **MENTERI DALAM NEGERI** menyatakan berapakah anggota baru telah ditawarkan semasa pengambilan konstabel polis khas bagi kaum Cina. Adakah pengambilan khas ini akan diteruskan. Adakah siswazah yang telah direkrut sebagai konstabel akan dinaikkan pangkat ke jawatan inspektor secara automatik.
21. PR-1343-L77057  
**Tuan Haji Ahmad Lai bin Bujang [ Sibuti ]** minta **MENTERI DALAM NEGERI** menyatakan apakah status cadangan untuk membina Balai Polis di kawasan Taman Tunku dalam kawasan Lambir.
22. PR-1343-L76307  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI PENDIDIKAN TINGGI** menyatakan hasil pelaksanaan penilaian bersepadu yang dimulakan oleh IPT perintis dan bagaimana Program iCGPA (Sistem Purata Nilai Gred Kumulatif Bersepadu) boleh melonjakkan peningkatan adab dan keilmuan dalam kalangan penuntut universiti.
23. PR-1343-L75931  
**Datuk Seri Panglima Haji Abdul Ghapur bin Haji Salleh [ Kalabakan ]** minta **PERDANA MENTERI** menyatakan memandangkan bahawa Malaysia diberi kuota Haji mengikut kaedah 1% daripada penduduk Malaysia dan ini bererti 28,000 penduduk yang layak. Berapakan daripada jumlah ini diperuntukkan kepada negeri Sabah.
24. PR-1343-L76772  
**Tuan Teo Kok Seong [ Rasah ]** minta **PERDANA MENTERI** menyatakan :-
- (a) bagaimanakah Kerajaan memastikan kepentingan penduduk yang terlibat di dalam pengambilan tanah untuk Projek Kereta Api Laju Kuala Lumpur-Singapura terjamin khususnya kepada mereka yang tinggal di Labu, Nilai dan kawasan yang terlibat di Negeri Sembilan; dan
  - (b) mengapakah Kerajaan masih bercadang untuk melaksanakan Projek Kereta Api Laju Kuala Lumpur-Singapura walaupun Projek Keretapi Landasan Berkembar Elektrik telah wujud dan fungsinya lebih kurang sama.
25. PR-1343-L76542  
**Datuk Joseph Salang anak Gandum [ Julau ]** minta **PERDANA MENTERI** menyatakan langkah-langkah yang dilaksanakan dalam usaha merapatkan jurang pembangunan antara Semenanjung Malaysia dan Wilayah Sabah dan Sarawak.

26. PR-1343-L76890  
**Tuan Loke Siew Fook [ Seremban ]** minta **MENTERI DALAM NEGERI** menyatakan mengapa pihak polis tidak mengambil tindakan terhadap ahli-ahli Pemuda UMNO Wilayah Persekutuan yang mengadakan demonstrasi di depan Ibu Pejabat DAP pada 12 Julai 2016 serta mengeluarkan kenyataan-kenyataan yang berunsur hasutan dan berbau perkauman.
27. PR-1343-L75719  
**Dato' Sri Wee Jeck Seng [ Tanjong Piai ]** minta **MENTERI SUMBER MANUSIA** menyatakan apakah syarat mewajibkan majikan mengiklankan kekosongan satu jawatan dalam portal JobsMalaysia sebelum pengambilan pekerja asing diberi pertimbangan dapat memastikan keutamaan pekerjaan diberi kepada warganegara.
28. PR-1343-L76572  
**Tuan Ahmad Marzuk bin Shaary [ Bachok ]** minta **MENTERI SUMBER ASLI DAN ALAM SEKITAR** menyatakan menyatakan status kemajuan dan kos terkini projek tebatan banjir dan pembinaan empangan di Kelantan.
29. PR-1343-L75700  
**Ir. Shahrudin bin Ismail [ Kangar ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapakah jumlah peniaga dalam talian "*online*" yang telah mendaftarkan perniagaan mereka dengan Suruhanjaya Syarikat Malaysia (SSM) dan apakah terdapat sebarang usaha dalam penguatkuasaan syarat pendaftaran perniagaan "*online*" dengan lebih terperinci agar kadar kes penipuan hasil daripada jual beli secara *online* dapat dikurangkan.
30. PR-1343-L76490  
**Tuan Wong Sze Phin @ Jimmy [ Kota Kinabalu ]** minta **MENTERI PELANCONGAN DAN KEBUDAYAAN** menyatakan secara terperinci kempen anti "Van Putih" yang dijalankan di Sabah. Apakah penjelasan Kementerian tentang pertindihan kuasa dengan Lembaga Perlesenan Kenderaan Perdagangan (LPKP) dalam isu ini. Kementerian hanya mempunyai kuasa untuk mengambil tindakan ke atas pengusaha pelancongan dan bukannya pemilik kenderaan.
31. PR-1343-L76607  
**Dr. Tan Seng Giaw [ Kepong ]** minta **MENTERI PERDAGANGAN ANTARABANGSA DAN INDUSTRI** menyatakan usaha memastikan pihak industri boleh mendapat para pekerja asing dengan kos munasabah tanpa dieksploitasikan dan birokrasi.
32. PR-1343-L77261  
**Datuk Wilson Ugak Kumbong [ Hulu Rajang ]** minta **MENTERI KEWANGAN** menyatakan berapakah jumlah rumah panjang di Sarawak yang telah diberikan pinjaman tanpa faedah, dan nyatakan jumlah pinjaman yang telah diluluskan sehingga hari ini.

33. PR-1343-L77282  
**Tuan Shamsul Iskandar bin Mohd Akin [ Bukit Katil ]** minta **PERDANA MENTERI** menyatakan sama ada tindakan Jabatan Kehakiman Amerika Syarikat untuk memfailkan kes mengenai 1MDB akan membawa apa-apa kesan terhadap hubungan antara Malaysia dengan Amerika Syarikat dan adakah ini menjadi punca utama ketidakhadiran Perdana Menteri ke Mesyuarat Majlis Keselamatan Pertubuhan Bangsa-Bangsa Bersatu dan Persidangan Agung Pertubuhan Bangsa-Bangsa Bersatu.
34. PR-1343-L75549  
**Datuk Dr. Ewon Ebin [ Ranau ]** minta **PERDANA MENTERI** menyatakan :-
- (a) apakah punca utama yang menyebabkan kawasan ESSCOM bolos dan berlakunya penculikan untuk tebusan di kawasan ini; dan
  - (b) apakah pihak Kerajaan sedia memindahkan tugas menjaga sempadan negara daripada ESSCOM kepada Angkatan Tentera Malaysia seperti dalam kes menjaga sempadan Malaysia-Thailand.
35. PR-1343-L76824  
**Datuk Wira Haji Ahmad bin Hamzah [ Jasin ]** minta **PERDANA MENTERI** menyatakan penanda aras antarabangsa yang diguna pakai untuk layak digelar sebagai negara maju / berpendapatan tinggi dari segi nominal gni per kapita dalam USD, peratus sumbangan sektor perkhidmatan kepada GNI, peratus sumbangan gaji & upah (*Compensation of Employees*) kepada GNI.
36. PR-1343-L75524  
**Puan Teresa Kok Suh Sim [ Seputeh ]** minta **MENTERI PENGANGKUTAN** menyatakan jumlah hasil pendapatan penjualan nombor kenderaan khas dan plat nombor kereta "V" dalam tahun 2013, 2014, 2015 dan setakat Oktober 2016. Bagaimanakah Kementerian menggunakan hasil daripada penjualan plat nombor khas ini.
37. PR-1343-L76125  
**Tuan Wong Tien Fatt @ Wong Nyuk Foh [ Sandakan ]** minta **MENTERI DALAM NEGERI** menyatakan tindakan yang telah diambil oleh pihak penguat kuasa untuk menggantung IC yang tidak sah dalam pecahan setiap tahun dari tahun 2011 hingga 2015. Apakah langkah-langkah Kerajaan untuk membasmi masalah IC yang tidak sah yang berleluasa di negara kita.
38. PR-1343-L77178  
**Tuan Tony Pua Kiam Wee [ Petaling Jaya Utara ]** minta **PERDANA MENTERI** menyatakan :-
- (a) senarai sumbangan yang dibuat oleh 1MDB dan lain-lain perbadanan kepada Yayasan Rakyat 1Malaysia (YR1M); dan
  - (b) Senarai secara terperinci perbelanjaan YR1M untuk setiap tahun sejak 2013

39. PR-1343-L76367  
**Tuan Sim Chee Keong [ Bukit Mertajam ]** minta **MENTERI DALAM NEGERI** menyatakan berapakah jumlah bayaran telah dibayar kepada Bestinet untuk urusan pekerja asing dan untuk tugas apa, serta bila pembayaran bermula. Apakah anggaran pembayaran untuk tahun 2016-2018 setiap tahun.
40. PR-1343-L76332  
**Datuk Ikmal Hisham bin Abdul Aziz [ Tanah Merah ]** minta **MENTERI KOMUNIKASI DAN MULTIMEDIA** menyatakan apakah tindakan Kementerian untuk membanteras sindiket yang secara terbuka menawarkan permainan judi online menerusi khidmat pesanan ringkas (SMS) yang dikirimkan secara rawak kepada orang ramai, tindakan mereka ini bukan sahaja mencabul Akta Perlindungan Data Peribadi 2010 (APDP) malah mampu menyebabkan masyarakat terjebak dengan gejala perjudian.
41. PR-1343-L76927  
**Tuan V. Sivakumar [ Batu Gajah ]** minta **PERDANA MENTERI** menyatakan jumlah pekerja yang diberhentikan oleh Petronas berikutan kejatuhan harga minyak yang mendadak pada tahun 2015 dan 2016. Bagaimanakah kedudukan kewangan dan pendapatan Petronas pada tahun ini berbanding dengan tahun-tahun sebelumnya.
42. PR-1343-L76461  
**Tuan Charles Anthony Santiago [ Klang ]** minta **MENTERI DALAM NEGERI** menyatakan status terkini pembawaan masuk pekerja-pekerja asing Bangladesh sebanyak 1.5 juta orang ke Malaysia. Berapakah jumlah pekerja yang telah sampai dan bekerja di Malaysia hingga bulan September 2016.
43. PR-1343-L76523  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI PELANCONGAN DAN KEBUDAYAAN** menyatakan penjelasan mengenai para pakar pengkaji sejarah yang telah dibayar oleh Kerajaan untuk mengkaji sejarah kedudukan orang-orang Melayu di Malaysia. Berapakah bayaran yang telah dibayar kepada para pakar ini dan apakah hasil penemuan daripada pakar-pakar sejarah ini.
44. PR-1343-L76731  
**Dato' Abdullah Sani bin Abdul Hamid [ Kuala Langat ]** minta **MENTERI SUMBER MANUSIA** menyatakan tindakan Kerajaan untuk memberi kemudahan pengangkutan untuk hadir ke mahkamah.
45. PR-1343-L76463  
**Tuan Charles Anthony Santiago [ Klang ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan sama ada Kerajaan setuju bahawa 60% isi rumah di Malaysia hidup dalam keadaan kewangan yang tidak stabil dan tidak dapat menampung kos kehidupan yang tinggi. Apakah langkah Kerajaan untuk menurunkan beban golongan ini.

46. PR-1343-L75883  
**Dato' Takiyuddin bin Hassan [ Kota Bharu ]** minta **PERDANA MENTERI** menyatakan sejauh manakah Program Empower ECER berjaya menangani masalah kemiskinan luar bandar dan golongan bawahan 40% (B40) di Wilayah ECER.
47. PR-1343-L76234  
**Tuan Sim Tze Tzin [ Bayan Baru ]** minta **MENTERI KEWANGAN** menyatakan justifikasi Kumpulan Wang Simpanan Pekerja (KWSP) membeli 40% kepentingan dalam Konsortium Lebuhraya Utara-Timur (KL) atau Kesturi yang mengendalikan Lebuhraya DUKE dengan harga yang tinggi pada 1.13 bilion ringgit berbanding nilai harga pasaran (*valuation*). Adakah keputusan ini melibatkan tekanan politik.
48. PR-1343-L76271  
**Dr. Lee Boon Chye [ Gopeng ]** minta **MENTERI KEWANGAN** menyatakan jumlah hutang isi rumah (*Household Debts*), jumlah hutang korporat (*Corporate Debts*) dan jumlah hutang Kerajaan Persekutuan mengikut peratusan KDNK.
49. PR-1343-L75832  
**Tuan Gobind Singh Deo [ Puchong ]** minta **MENTERI DALAM NEGERI** menyatakan bilangan orang yang ditahan di bawah Akta Hasutan sejak 2008 (dari tahun ke tahun), bilangan orang yang dituduh dan bilangan orang yang telah disabitkan untuk kesalahan yang sama.
50. PR-1343-L77408  
**Datuk Haji Shabudin bin Yahaya [ Tasek Gelugor ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah langkah jangka masa panjang yang dilakukan pihak Kerajaan bagi meningkatkan pengurusan sisa pepejal negara berikutan tragedi terbaru kebocoran tapak sisa pepejal di Langkawi UNESCO Global Geopark sehingga mencemarkan Sungai Kilim.



**ATURAN URUSAN MESYUARAT DAN USUL-USUL**

1. (D.R. 17/2016) **Rang Undang-undang Perbekalan 2017 – Menyambung semula perbahasan atas masalah, “ Bahawa Rang Undang-Undang ini dibacakan kali yang kedua sekarang, “ ( 25 Oktober, 2016 )**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari empat puluh lapan bilion ringgit (RM48,000,000,000) dibelanjakan daripada Kumpulan Wang Pembangunan bagi tahun 2017, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2017, yang dibentangkan sebagai Kertas Perintah 25 Tahun 2016, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

**Menyambung semula Perbahasan atas masalah (25 Oktober, 2016)**

- |    |               |   |                               |
|----|---------------|---|-------------------------------|
| 2. | (D.R.18/2016) | Rang Undang-Undang Kewangan 2016  | <b>Bacaan Kali Yang Kedua</b> |
|    |               | <b>[ Menteri Kewangan ]</b>   |                               |
| 3. | (D.R.13/2016) | Rang Undang-Undang Mahkamah (Kaedah-Kaedah Pemulaan Tindakan Sivil) 2016                        | “                             |
|    |               | <b>[ Menteri di Jabatan Perdana Menteri ]</b>   |                               |
| 4. | (D.R.16/2016) | Rang Undang-Undang Pentadbiran Undang-undang Islam (Wilayah-Wilayah Persekutuan) (Pindaan) 2016 | “                             |
|    |               | <b>[ Menteri di Jabatan Perdana Menteri ]</b>   |                               |
| 5. | (D.R.15/2016) | Rang Undang-Undang Pendaftaran Kelahiran dan Kematian (Pindaan) 2016                            | “                             |
|    |               | <b>[ Menteri Dalam Negeri ]</b>   |                               |

6. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan sebahagian pinjaman yang diberikan oleh Kerajaan Malaysia sebanyak RM500 juta kepada Small Medium Enterprise Development Bank Malaysia Berhad (SME Bank), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Lima Ratus Juta (500,000,000) unit saham biasa pada RM1 bagi satu unit saham”.

7. **Dato’ Seri Abdul Hadi bin Awang [ Marang ]** akan mencadangkan:-

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

i. menggantikan Seksyen 2 dengan seksyen berikut:

“**2.** Mahkamah Syariah akan mempunyai kuasa ke atas seseorang penganut agama Islam dan di dalam hal-hal kesalahan di bawah perkara-perkara yang disenaraikan di dalam Butiran 1 Senarai Negeri di bawah Jadual Kesembilan Undang-Undang Persekutuan.”; dan

ii. memasukkan selepas seksyen 2 dengan seksyen berikut:

“**2A.** Dalam menjalankan undang-undang jenayah di bawah Seksyen 2 Mahkamah Syariah berhak menjatuhkan hukuman yang dibenarkan oleh undang-undang syariah berkaitan hal-hal kesalahan yang disenaraikan di bawah seksyen yang disebutkan diatas, selain dari hukuman mati.”

**[ Menteri di Jabatan Perdana Menteri ]**

8. PR-1343-U75583

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kesan pemanasan global telah mencapai satu tahap yang amat serius di mana disebabkan peningkatan paras air laut, terdapat banyak sawah-sawah padi tidak lagi dapat ditanam dengan tanaman padi disebabkan sawah-sawah padi ini telah dicemari dengan air masin. Dan mengambil maklum juga bahawa kesan daripada fenomena ini, para petani terutama sekali mereka yang menanam padi di sawah-sawah padi yang berkedudukan tanah rendah atau pesisir pantai kehilangan punca pendapatan dan sekaligus kualiti hidup mereka turut terjejas. Dan mengambil maklum juga bahawa, sebagai langkah mitigasi bagi memulihkan ekonomi para petani ini,

Kerajaan hendaklah membantu mereka dengan memperkenalkan tanaman bernilai komersial lain, yang sesuai ditanam di sawah yang dimasuki air masin tersebut seperti penanaman kelapa pandan dan sebagainya. Dan mengambil maklum juga bahawa penyediaan dan pengorekan perparitan untuk meninggikan paras tanah yang dimaksudkan di atas, di kawasan yang terlibat akan membolehkan kawasan yang terlibat tidak ditenggelami air masin. Maka, bagi menangani masalah ini, Dewan ini hendaklah mengambil ketetapan bahawa, di samping menangani isu pemanasan global secara serius, Kerajaan juga harus segera membantu para petani (atau pesawah padi) dalam mengusahakan semula sawah-sawah padi mereka yang terjejas oleh fenomena ini, dengan memperkenalkan tanaman bernilai komersial yang baru di tanah tersebut."

**[ Menteri Pertanian dan Industri Asas Tani ]**

9. PR-1343-U75584

**Datuk Dr. Makin @ Marcus Mojigoh [ Putatan ]** akan mencadangkan:-  
"Bahawa Dewan ini mengambil maklum bahawa dengan purata hujan tahunan negara kini telah meningkat sering kita dengar tentang keadaan banjir kilat yang telah banyak menyebabkan kemusnahan harta benda, ameniti sosial, kerosakan alam sekitar dan lain-lain yang menjangkau jutaan ringgit nilainya. Dan mengambil maklum juga bahawa keadaan banjir ini ditambah burukkan lagi di mana banyak kolam dan paya ditimbus bagi pembangunan hartanah dan sebagainya. Ini menyebabkan sungai-sungai dan terusan tidak lagi dapat menampung jumlah air yang mengalir secara mendadak. Dan mengambil maklum juga bahawa, sebagai langkah mitigasi, kolam-kolam air yang luas boleh diwujudkan dalam sesuatu kawasan bagi menampung air hujan lebat yang turun sebelum ianya mengalir ke sungai-sungai dan terusan, sekali gus dapat mengurangkan kejadian banjir kilat. Dan mengambil maklum juga bahawa, takungan air di kolam-kolam tadi boleh juga dirawat dan disalurkan ke empangan bekalan air yang mana boleh digunakan sebagai air terawat oleh para pengguna. Dan mengambil maklum juga bahawa air daripada takungan kolam itu juga boleh disalurkan kepada industri-industri yang memerlukannya di samping digunakan untuk menyiram tanaman atau taman-taman. Maka, bagi menangani masalah banjir kilat ini, dewan yang mulia ini hendaklah mengambil ketetapan bahawa Kerajaan hendaklah mensyaratkan bahawa sebelum sesuatu zon itu dibangunkan, satu kawasan kolam takungan air hendaklah disediakan bagi maksud di atas."

**[ Menteri Sumber Asli dan Alam Sekitar ]**

10. PR-1343-U75585

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, ramai graduan serta lulusan sekolah menengah tidak berpeluang untuk mendapatkan kerja dan kebanyakan mereka ini akhirnya hanya berlegar di kampung masing-masing dan tidak berpendapatan.

Dan mengambil maklum juga bahawa, masih banyak peluang-peluang perniagaan yang boleh diusahakan di kampung-kampung sekiranya mereka yang berminat mendapat latihan, bimbingan dan bantuan kewangan yang secukupnya. Dan mengambil maklum juga bahawa pihak Kerajaan telah beberapa kali mengutarakan program pembangunan desa seperti program satu kampung satu industri, namun belum ada lagi program seumpamanya yang benar-benar berjaya. Dan mengambil maklum juga bahawa kebanyakan bekalan bahan mentah bagi penghasilan produk makanan, herba, tenusu dan lain-lain lagi boleh didapati di kampung-kampung dengan mudah. Dan mengambil maklum juga bahawa, melalui program "cottage industry" bukan sahaja penduduk kampung yang terlibat dalam program ini akan mendapat manfaat, malah negara secara keseluruhannya akan mendapat manfaat daripada aliran aktiviti ekonomi yang dijana. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan merumus satu mekanisme yang lebih efektif bagi menggalakkan penglibatan penduduk kampung dalam aktiviti "cottage industry" yang mana akan dapat membawa manfaat kepada 15-20 orang daripada setiap kampung."

**[ Menteri Kemajuan Luar Bandar dan Wilayah ]**

11. PR-1343-U75586

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kos sara hidup keluarga telah meningkat dengan mendadak dan ini dapat dirasakan begitu hebat sekali oleh mereka daripada golongan berpendapatan rendah. Dan mengambil maklum juga bahawa teknologi solar yang terdapat pada hari ini dapat membekalkan tenaga eletrik dengan murah dan mesra alam. Dan mengambil maklum juga bahawa kadar penurunan hujan di negara ini agak tinggi dan boleh membekalkan bekalan air mentah yang cukup sekiranya ditadah dan disimpan dengan baik. Maka, bagi meringankan kos sara hidup keluarga terutama sekali mereka yang dari golongan berpendapatan rendah, Dewan yang mulia ini hendaklah mengambil ketetapan bahawa, semua pembinaan PPRT yang baru hendaklah dilengkapi dengan sistem tenaga solar dan tangki tadahan air bagi membolehkan pemilik rumah tersebut menurunkan sedikit kos sara hidup keluarga mereka."

**[ Menteri Kesejahteraan Bandar, Perumahan dan Kerajaan Tempatan ]**

12. PR-1343-U75587

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, terdapat desas-desus bahawa pencarum Kumpulan Wang Simpanan Pekerja (KWSP) yang masih menabung dalam KWSP, yang telah mencapai umur 75 tahun, yang dikatakan mencecah jumlah 260,000 orang, tidak lagi dibayar dividen ke atas simpanan mereka di dalam KWSP, seperti yang disiarkan oleh akhbar The Sun Daily. Dan mengambil maklum juga bahawa, kekeliruan ini adalah disebabkan oleh polisi KWSP yang dikeluarkan pada tahun 2008, melalui Akta KWSP 1991 yang menerangkan bahawa simpanan para pencarum yang telah mencapai umur 75 tidak akan dibayar dividen."

Dan mengambil maklum juga bahawa para pesara yang masih menyimpan akaun dengan pihak KWSP masih memerlukan sumber pendapatan yang terurus dengan kadar pulangan yang baik dan KWSP dikatakan memberikan kadar pulangan yang baik serta terjamin selamat. Maka, bagi menangani masalah ini dan membela nasib para pendeposit KWSP yang dimaksudkan, Dewan yang mulia ini hendaklah mengambil ketetapan bahawa Kerajaan hendaklah segera meminda Akta 1991 dan membatalkan polisi KWSP 2008 bagi memastikan agar para pencarum atau penabung KWSP menerima dividen selagi mereka masih mempunyai akaun yang aktif dengan KWSP."

**[ Menteri Kewangan ]**

13. PR-1343-U75588

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kos barangan dan kos sara hidup di negeri Sabah adalah antara yang tertinggi di negara ini dan polisi kabotaj, dikatakan sebagai antara penyebab utama keadaan ini berlaku. Dan mengambil maklum juga bahawa, akibat polisi kabotaj ini, kapal-kapal dagang dari luar negara tidak dibenar memunggah dan mengangkut barangan dari mana-mana pelabuhan di Malaysia kecuali di Pelabuhan Klang. Ini menyebabkan barangan tersebut terpaksa di angkut semula dengan kos tambahan ke pelabuhan-pelabuhan di negeri Sabah dan Sarawak. Dan mengambil maklum juga bahawa disebabkan polisi kabotaj ini, kadar caj penghantaran antara pelabuhan ditetapkan oleh pihak perkapalan dengan kawalan terhad oleh pihak Kerajaan. Misalnya, caj penghantaran kontena 20 kaki dari pelabuhan Klang ke pelabuhan Kota Kinabalu ialah RM2,436, ke pelabuhan Sandakan RM3,235 dan ke pelabuhan Tawau RM3,336. Ternyata caj ini adalah terlalu tinggi jika dikira dari segi jarak batu nautika antara pelabuhan berbanding dengan caj penghantaran di pelabuhan-pelabuhan lain. Maka, bagi menangani masalah ini serta mengimbangi harga barangan dan kos sara hidup di negeri Sabah, Dewan yang mulia ini hendaklah mengambil ketetapan bahawa Kerajaan hendaklah segera membatalkan polisi kabotaj ini bagi meringankan beban rakyat Sabah dan Sarawak khasnya."

**[ Menteri Kewangan ]**

14. PR-1343-U75589

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kebanjiran warga asing ke negara ini telah membawa budaya yang kurang baik di negara ini di mana mereka dengan sewenang-wenangnya membuang sampah merata-rata dan ini dapat kita lihat di kota-kota besar pada hujung minggu di mana mereka ini keluar beriadah. Dan mengambil maklum juga bahawa, sejak akhir-akhir ini, penduduk tempatan juga telah mula dijangkiti dengan sikap kutu sampah yang dimaksudkan di atas, di mana penduduk tempatan juga mula membuang sampah merata-rata.

Dan mengambil maklum juga bahawa penularan pelbagai jenis penyakit bawaan vektor, tikus, lipas dan lalat, pembuangan sampah merata-rata telah menambah-burukkan lagi ancaman kesihatan di negara ini. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah memindah undang-undang bagi menghukum kutu-kutu sampah dengan hukuman lebih berat lagi disamping menggalakkan lebih banyak usaha untuk kitar semula dijalankan."

**[ Menteri Kesejahteraan Bandar, Perumahan dan Kerajaan Tempatan ]**

15. PR-1343-U76223

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1 MDB (1 Malaysia Development Bhd) dibentang dan dikemukakan untuk perbahasan di Dewan Rakyat dengan kadar segera."

**[ Perdana Menteri ]**

16. PR-1343-U76225

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

**[ Perdana Menteri ]**

17. PR-1343-U76226

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya mengesyorkan kepada DYMM Seri Paduka Baginda Yang Di Pertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera."

**[ Perdana Menteri ]**

18. PR-1343-U76228

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

**[ Perdana Menteri ]**

19. PR-1343-U77356

**Tuan M. Kulasegaran [ Ipoh Barat ]** akan mencadangkan:-

"Bahawa Dewan ini mengambil maklum, Parlimen sepatutnya mengambil maklum kes penembakan Lucus a/l Asirvatham dari Ipoh semasa bekerja di kebunnya di Chemor Perak pada 11 Ogos 2016 oleh seorang bekas pegawai kanan polis. Kes penembakan tersebut perlu disiasat secara ketat dan efektif melalui penubuhan sebuah badan jawatankuasa yang bebas dan integriti serta laporannya diumumkan kepada orang ramai (made public)."

**[ Menteri Dalam Negeri ]**

20. PR-1343-U75910

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan langkah-langkah untuk mencegah pengganas di Malaysia."

**[ Menteri Dalam Negeri ]**

21. PR-1343-U75911

**Dr. Tan Seng Giaw [ Kepong ]** akan mencadangkan:-

"Bahawa Dewan ini memperbincangkan dasar penyelenggaraan semua jenis pengangkutan di negara".

**[ Menteri Pengangkutan ]**

22. PR-1343-U75794

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan mempergiatkan usaha untuk meyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 59 tahun lalu supaya mereka boleh hidup dengan aman dan saling memerlukan dan memahami antara satu sama lain bagi memudahkan mereka membangunkan ekonomi negara secara bersama dan merealisasikan impian Malaysia."

**[ Perdana Menteri ]**

23. PR-1343-U75795

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

**[ Menteri Kesejahteraan Bandar, Perumahan dan Kerajaan Tempatan ]**

24. PR-1343-U75707

**Tuan Loke Siew Fook [ Seremban ]** akan mencadangkan:-

"Bahawa Dewan ini merakamkan sekalung tahniah dan setinggi-tinggi penghargaan kepada wira dan wirawati negara yang telah mengharumkan nama negara di Sukan Paralimpik dan Olimpik 2016 di Rio De Janerio. Kejayaan Mohamad Ridzuan Mohamad Puzi acara 100 meter, Muhammad Ziyad Zolkefli acara lontar peluru dan Abdul Latif Romly acara lompat jauh merangkul tiga pingat emas pertama untuk Malaysia dalam Sukan Paralimpik serta dua rekod dunia yang dicapai oleh mereka adalah satu kejayaan yang luar biasa dan sangat dibanggakan. Atlet wanita Siti Noor Radiah Ismail yang memenangi pingat gangsa dalam acara lompat jauh di Sukan Paralimpik juga merupakan satu pencapaian yang membanggakan. Dewan ini juga merakamkan ucapan setinggi-tinggi tahniah terhadap atlet-atlet negara yang memenangi 4 pingat perak dan 1 pingat gangsa di Sukan Olimpik Rio 2016 iaitu pemenang pingat perak dalam acara badminton perseorangan lelaki Dato Lee Chong Wei, badminton beregu lelaki Goh V Shem-Tan Wee Kiong, badminton beregu campuran Chan Peng Soon-Goh Chan Ying dan pemenang pingat perak dalam acara terjun Pandelesa Rinong-Chan Jun Heong serta pemenang pingat gangsa acara berbasikal keirin Azizulhasni Awang. Atlet-atlet tersebut telah mencapai keputusan yang terbaik untuk kontijen Malaysia dalam sejarah penyertaan negara dalam Sukan Olimpik dan kejayaan tersebut harus dibanggakan oleh seluruh rakyat Malaysia."

**[ Menteri Belia dan Sukan ]**

25. PR-1343-U77348

**Tuan Liew Chin Tong [ Kluang ]** akan mencadangkan:-

"Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2016, anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM5.9 bilion dan RM14 bilion yang membawa kepada jumlah keseluruhan RM20 bilion."

**[ Menteri Kewangan ]**

26. PR-1343-U77349

**Tuan Liew Chin Tong [ Kluang ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini."



Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

**[ Perdana Menteri ]**

27. PR-1343-U77437

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

**[ Menteri Dalam Negeri ]**

28. PR-1343-U77438

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

**[ Menteri Dalam Negeri ]**

29. PR-1343-U77439

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**[ Menteri Pendidikan ]**

30. **Tuan Gobind Singh Deo [ Puchong ]** akan mencadangkan:-

Pada 17.10.2016, Tuan Yang Di-Pertua telahpun membuat keputusan di dalam Dewan Rakyat seperti berikut:

Jadi masa tidak lagi mengizinkan. Jadi sesi pertanyaan-pertanyaan bagi jawapan lisan berakhir dan sebelum saya memanggil Setiausaha untuk beredar ke urusan mesyuarat yang lain, ada satu perkara mustahak yang ingin saya umumkan iaitu Ahli-ahli Yang Berhormat **saya mendapati beberapa soalan dalam pertanyaan jawapan lisan dan bertulis serta usul yang telah dikemukakan bagi Mesyuarat Ketiga Penggal Keempat Parlimen Ketiga Belas kali ini berkaitan dengan satu isu yang menjadi kegemaran ahli-ahli Yang Berhormat iaitu isu tindakan sivil in rem oleh Jabatan Keadilan Amerikat Syarikat atau singkat DOJ.**

Jadi untuk mengelakkan lagi satu pertuduhan seperti di sesi yang lalu iaitu di mana soalan yang perlu dijawab secara lisan oleh kerana tidak ada masa untuk dijawab pada ketika itu, maka Menteri menjawab mengatakan bahawa tidak payalah dijawab secara bertulis oleh kerana itu adalah *sub judice*.

Jadi dalam hal ini, dalam sesi ini juga ada perkara-perkara yang sedemikian. Jadi saya tidak mahu lagi timbul satu persepsi di mana Menteri akan dituduh bahawa dia *assumed the role of Speaker*. **Jadi untuk itu setelah meneliti isi kandungan pertanyaan-pertanyaan tersebut, saya mendapati bahawa ia adalah perkara yang masih dalam timbangan mahkamah ataupun sub judice. Oleh itu Menteri yang berkenaan tidak perlu jawab kepada perkara-perkara tersebut.** Manakala kepada Ahli-ahli Yang Berhormat yang sedemikian untuk memuaskan hati mereka saya akan sampaikan setiap Ahli Yang Berhormat keputusan saya secara bertulis. Terima kasih. Sila.

Dengan hormatnya, saya usulkan supaya keputusan Tuan Yang Di-Pertua tersebut dikaji semula menurut Peraturan 43 Peraturan Majlis Mesyuarat di atas alasan-alasan berikut:

- (i) Peraturan yang menghalang pertanyaan oleh kerana *sub judice* tidak terpakai kepada kes-kes di luar Malaysia.
- (ii) Oleh yang demikian, tindakan *sivil in rem* oleh Jabatan Keadilan Amerika Syarikat tidak boleh menjadi asas untuk penolakan soalan ataupun seseorang Menteri dikecualikan daripada menjawab soalan tersebut atas alasan perkara itu *sub judis*.
- (iii) Perkara ini dibincangkan dalam "Buku Erskine May's Treaties on The Law, Privileges, Proceeding's and Usage of Parliament 24th Edition 2011" di mana 365 dimukasurat disebut seperti berikut:

### **Matters sub judice**

By a resolution of the House, cases in which proceedings are active in United Kingdom courts shall not be referred to in any motion, debate or question (see pp 396, 441-443); though the House has further resolved to give Chair some discretion to allow reference to be made to matters awaiting or under jurisdiction in all civil courts in certain specified circumstances, **provided that there is no real and substantial danger of prejudice to the proceedings.**

The 'sub judice rule' as it is called, also applied to matters before a coroner's court or a Fatal Accident Inquiry. If the subject-matter of the question is found to be, or become, sub judice of the questions has been given, the Member is asked to withdraw it, or the Speaker may direct it to be removed from the notice paper or refuse to allow it to be asked if it is on the Order Paper.

**The rule does not apply to matters which are sub judice in courts of law outside Great Britain and Northern Island, nor to matters which are the subject of administrative inquiry.**

- (iv) jadi dengan segala hormatnya, jelas bahawa keputusan Tuan Speaker yang berasaskan kepada alasan sub judice adalah bertentangan dengan praktis yang diamalkan berkenaan isu itu dan oleh yang sedemikian boleh dan perlu dikaji semula.
- 2. Seterusnya dengan merujuk kembali lagi kepada petikan di dalam buku Erskine May di atas adalah jelas bahawa **sekiranya pun prosiding tersebut di dalam negara ini**, Tuan Speaker dalam memutuskan isu sama ada ataupun tidak perkara ini dihalang kerana sub judice perlu menilaikan sama ada wujud ataupun tidak "*real and substantial danger of prejudice*" kepada prosiding tersebut.
- (i) Dengan segala hormatnya untuk menimbang dan seterusnya membuat keputusan berkenaan perkara itu, saya berpendapat bahawa Tuan Speaker perlu:
  - (a) memberikan Ahli-ahli Parlimen peluang untuk didengar sebelum membuat sebarang keputusan berkenaannya.
  - (b) menyakinkan diri dengan rujukan penuh kepada prosiding Mahkamah tersebut dan seterusnya menimbangkan kesan soalan-soalan yang ditanya kepada prosiding tersebut sebelum membuat keputusan tersebut.
- 2 (ii) Di dalam hal ini, saya memohon supaya Tuan Speaker menjelaskan sama ada ataupun tidak Tuan Speaker ada salinan dan sudah menimbang dengan mendalam semua kertas-kertas kuasa dalam prosiding DOJ tersebut (iaitu tuntutan dan jawapan-jawapan kepadanya sekiranya ada) untuk menyakinkan diri Tuan Speaker berkenaan fakta-fakta serta isu-isu yang berbangkit dalam perkara itu untuk membuat keputusan bahawa soalan-soalan itu adalah dihalang oleh perkara *sub judice*.

- 3 (i) seterusnya saya dengan segala hormatnya memohon rujuk kepada Peraturan 36(1) dan 23(1)(g) Peraturan Mesyuarat Dewan Rakyat di mana cukup jelas bahawa perkara yang perlu diputuskan adalah:

23(1)(g) A question shall not be so drafted as to be likely to prejudice a case under trial, or be asked to any matter **which is sub judice**; dan

36(2) Reference shall not be made to any matter which is sub judice in such a way might in the opinion of chair ***prejudice the interests of parties thereto***”

- 3 (ii) Dengan segala hormatnya, menurut Peraturan tersebut Tuan Speaker perlu untuk menentusahkan “parties” kepada tindakan ini dan kepentingan mereka sebelum keputusan berkenaan prejudis yang mungkin timbul seakibat soalan yang diajukan itu.

Tuan Speaker,

Negara kami dilanda krisis dan segi wujudnya satu perkara yang melibatkan wang yang sangat besar yang kini menjadi topik perbincangan hangat bukan sahaja di Malaysia tetapi di seluruh dunia.

Perkara ini telahpun menyebabkan tindakan yang tegas diambil oleh negara-negara seperti Singapura, United Kingdom dan Amerika Syarikat manakala di negara kita tiada sebarang tindakan berkesan diambil terhadap mana-mana pihak sama sekali sehingga sekarang.

Perkara ini telahpun menyebabkan banyak soalan ditanya oleh rakyat Malaysia khususnya berkenaan corak pentadbiran Kerajaan kami dan pengendalian siasatan perkara ini oleh jabatan-jabatan seperti Jabatan Peguam Negara, PDRM dan SPRM.

Isu ini sudah semestinya menjadi satu isu berkepentingan awam dan amat sangat perlu dibahaskan di dalam Dewan Rakyat.

Keputusan Tuan Speaker dengan segala hormatnya mempunyai kesan penghalang perkara ini daripada dibahaskan secara transparan dan juga memprejudiskan kesemua pihak dengan amat sangat oleh kerana mereka kehilangan peluang untuk menyoal dan menjelaskan semua keraguan yang timbul di dalam Dewan Rakyat yang mulia ini untuk pengetahuan rakyat Malaysia secara keseluruhannya.

Saya juga merayu kepada Tuan Speaker supaya melihat kepada “precedent” yang akan dicapai melalui keputusan ini di mana daripada sekarang, mudah sekali untuk sesiapa menghalang sesuatu perkara itu dibangkitkan di Dewan Rakyat iaitu dengan memfailkan atau merujuk kepada prosiding di luar negara untuk tujuan itu.

Ini kepada saya bukan niat ataupun matlamat yang ingin dicapai oleh Peraturan Mesyuarat yang digubal untuk “enhance” dan bukannya “restrict” dengan izin, perbahasan perkara-perkara penting untuk negara kita di dalam Dewan Rakyat yang mulia ini.

Maka saya selaku Ahli Parlimen Puchong merayu supaya usul saya dibenarkan dibahas dan keputusan Tuan Speaker itu, dikaji semula dan diketepikan dengan serta merta.

**[ Perdana Menteri ]**

**\*\*UCAPAN**  
**( PERATURAN MESYUARAT 17 BAHARU )**  
**( KAMAR KHAS )**

<b>Tarikh Ucapan</b>	<b>Ahli Yang Berucap</b>	<b>Tajuk Ucapan</b>	<b>Menteri Yang Bertanggungjawab</b>
1. 26.10.2016 (Rabu)	1. YB Tuan V. Sivakumar (Batu Gajah)	1. 70% Pekerja Asing Adalah PATI, Apakah Tindakan KDN.	1. YB Menteri Dalam Negeri

**\*\* Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**